

四庫全書

集部

欽定四庫全書

集部

權文公集卷一至五

詳校官太常寺少卿

臣陳桂森

檢討臣何思鈞覆勘

總校官編修

臣

王燕緒

校對官中書

臣

劉源溥

謄錄監生

臣

魏昞年

欽定四庫全書

集部二

權文公集

別集類一唐

提要

臣等謹案權文公文集十卷唐權德輿撰德輿字載之天水人官至同平章事事迹具唐書本傳德輿嘗自纂制集五十卷楊憑序之其孫憲又編其詩文為五十卷楊嗣復序之今制集已佚文集亦久無傳本此本乃明嘉

靖二十年楊慎得之於滇南僅存目錄及詩賦十卷劉大謨序而刻之又刪其無書之目錄德輿文集舊目遂不可考惟文苑英華及唐文粹中時時散見尚有出此本之外者耳考王士禎居易錄載權文公集五十卷註曰詩賦十卷文四十卷碑銘八卷議論二卷記二卷集序三卷贈送序四卷策問一卷書二卷疏表狀五卷祭文三卷稱無錫顧宸藏本

劉體仁之子凡寫之以貽士禎者然則德興
全集康熙中猶存不識何以今所傳者皆楊
慎之殘本第士禎所註卷目以數計之乃八
十卷與五十卷之說不合又不識其何故今既
無可參證姑仍楊慎本錄之焉乾隆四十六
年十月恭校上

總纂官

臣紀昀臣陸錫熊臣孫士毅

總校官

臣陸費墀

權文公集序

唐有天下二百二十載用文章顯於時代有其人然而
自成童就傳以及考終命解巾筮仕以及釣衡師保造
次必於是視聽必於是文采皆正色而無駁雜調韻皆
正聲而無竒邪滔滔如江河東注不知其極而又處命
書綸綍之任專考覆品藻之柄參化成轉翊之勲初中
終全而有之得之於相國文公矣公諱德輿字載之天
水人也族望祖宗之遠當官行已之道語在國史銘於

壙而碑於途此不敢詳今所載者因緣文業而已早歲為淮南江西從事掾管記室之任屬詞詣理奏入而報可移文走檄疆事迎解登朝為起居舍人改駕部員外郎換司勳郎中遷中書舍人凡四任九年專掌詔誥大則發德音修典冊洒朝廷之利澤增盛德之形容小則褒才能叙官業區分流品申明沮勸無誕嗣無巧語誠直溫潤真王者之言公昔自纂錄為制集五十卷託於友人湖南觀察使楊公憑為之序故今不在編次

之內其他千名萬狀隨意所屬牢籠今古窮極微細
周流於親愛情理之間磅礴於黜賢久大之業不為利
疚不以菲廢本乎道以行乎文故能獨步當時人入心
服非以德爵齒挾而致之貞元中奉詔考定賢良草澤
之士升名者十七人及為禮部侍郎擢進士第七十有
二鸞鳳杞梓舉集其門登輔相之位者前後十人其他
征鎮岳牧文昌掖垣之選不可悉數方且繼居重任者
猶森然非精識洞鑒鑒其詞而知其人何以臻此邪

憲宗皇帝紹開中興始初英明申戚提法武功既愈文教是圖元和五年冬執政暴疾既瘳且痺未旬日而公作相憲章儒術潤色王度使和聲順氣發自廊廟而後豈浹於幽遐我之所長時以推戴玉立冰潔無緇磷遷染之譏以文德自終豈徒然哉嗣復不佞發跡門館儀曹台席皆添前躅公之元子中書舍人璩不幸短命其嗣憲孫泣奉文集求鄙文以冠篇首雖觀於巨海難挹於波濤而籍用白茅所負誠敬其五十卷次第

具在集目銀青光祿大夫充集賢殿大學士楊嗣復撰

欽定四庫全書

圖

序

權文公集序

夫物常聚於所好也故棄公好龍天龍聞而下之穆王
好仙王母降於瑤池况文章為天地間公器顧有好之
而弗得者乎昔歐陽公好古碑刻入咸不憚數千仞之
險數千里之遙購而致之觀諸集古錄為可徵已唐權公
載之為天水人相憲宗黼黻潤色彬彬可稱可泉胡公以
其為鄉先達嘗景仰愛慕思欲誦其詩讀其書皇皇焉求
之罔置在翰苑時每與升庵楊公論及升庵好學慕古

猶夫可泉也故遂識之心而恒訪之人經今三十稔矣
始於滇南士人家偶獲是集重之不啻九鼎太呂惜其
目錄與詩賦十卷僅存其他作四十卷并自纂制集五
十卷俱各散失莫知所在升庵托余轉寄可泉余意以
此貽可泉固足以償其平生愿見之懷恐其所未覩者
將遂湮沒沈鬱終不可得不如梓而行之有是書者庶或
見之將不遠千里欣欣然來相告矣寧不為可冀乎若
夫權公人品之光明勲業之弘遠儒術之純正詞翰之邃

古載在國史及楊公嗣復之序茲弗容贅書此數語
蓋以見二公嗜好之篤且以為權公全集之因也序云
乎哉

欽定四庫全書

權文公集卷一

賦 雜詩

傷馴鳥賦

唐 權德輿 撰

紛羽族之多端兮同翔飛而類殊有鸛鵒之微禽亦播
質於洪鑪因稚子之嬉遊得中園之墜雛恣飲啄以馴
擾來目前與座隅爾乃棲以籠檻鍛其羽翼留軒所以

為娛俾遐翫之無力乍踉蹌而將舉顧襍褻而復息雖
主人之見容終使喪天和於自得或親賓至止徽軫徐
觸每聞絃而鼓翼亦逗節而翹足貌宛轉以成態聲間
關而助曲乍寂寞以閒暇若凝情於相矚理輕毳以自
潔類山玄之佩玉每翔集以安卑同君子之自牧思謝
尚之起舞邁風流之逸躅苟魯昭之不君因乾侯之出
辱方渡濟以申傲伊涼德之自覆徵故老之相傳驗曩
記之或存在端午之司辰剪其舌而能言巧喉嚅以達

情順人心而不諼方渴日以呈材願朱明之駿奔忽愀
愴以顛顛響哀音於簾箔竟啁啾而不去若徊翔之有
託怵心訝而未辯歛狸狴之攫搏俄斃踣而不勝紛血
灑以毛落彼葛盧與冶長通鳥獸之音聲闕君子之周
防無古人之至精既不能縱爾於遼廓又不能遂爾之
生成使異類之得志曾未極其飛鳴則本夫養之之惠
適所以害其生生又憶夫清江之使者東海之波臣苟
其時之不来則剗腸而涸鱗鷗鐘鼓而反悲馬皂棧而

多死雖為遇之已甚固又失其天理嘗聞乎聖賢之理
物也愚智殊方薰猶異藏善用無棄兮互見其長各有
攸處兮兩不相傷官天地而府萬物由此道而為常吾既
悟斯理之不早因失之而後防收視聽以冥觀兮遂羣
性之茫茫

洞庭春溜滿賦

送陸滿赴荊州

湖渺渺兮蕩東風以發春春溜滿兮連淨綠以無垠接
遠色於青草散晴輝於白蘋及夫反照安流煙花明麗

霞生水底鳥沒空際聽櫂謳之四起見片帆之遠逝杳
空曠以澄鮮窮千里於一睇若乃路轉淞陽波連沅湘
杜蘅秀兮蕙若芳晚雲翠兮沉夕陽月明露下靄蒼蒼
結遐想於騷人兮悄目極以心傷婉婉長離翩翩綵鷁
遠泛桃花之浪去從蓮府之辟雲兮水兮指前程於空
碧

行舟透遠樹賦

送嚴暮赴東陽

有美一人兮桂為楫蘭為舟透遠樹之晴影泛春江之

卷一
碧流乍迷雲葉稍映蘋洲凝暮色於愁睇空藹藹以悠
悠的的輕帆亭亭遠質喜揚舲之漸近嗟轉岸而還失
映微波以蔥蒨貯嵐翠之蒙密愴南浦之別離占橫塘
之風日柳怨別兮楓傷春望不辨兮愁殺人空江邊兮
遠郊外紛離緒兮相對顰顰標落照以微明暮夕烟而又
晦波茫茫兮景沉沉思結纜於清陰惜歸舟之不駐傷
遠目以軫離心

奉和聖製九月十八日賜百寮追賞因書所懷

錫宴朝野洽追歡堯舜情秋堂絲管動水榭烟霞生黃
花媚新霽碧樹含餘清同和六律應交泰萬寓平春藻
下中天湛恩闡文明小臣諒何以亦此彰華纓

奉和聖製九日言懷賜中書門下及百寮

令節在豐歲皇情喜又安綠竹調六律簪裾列千官烟
霜暮景清水木秋光寒筵開曲池上望盡終南端天文
麗慶霄墨妙驚飛鸞願言黃花酒永奉今日歡

奉和聖製重陽日中外同歡以詩言志因示百

金匱要略卷一
寮

玉醴宴嘉節拜恩歡有餘煌煌菊花秀馥馥更房舒白
露秋稼熟清風天籟虛和聲度簫韶瑞氣深儲胥百辟
皆醉止萬方今宴如宸衷在化成藻思煥瓊琚微臣徒
竊抃豈足歌唐虞

奉和聖製中春麟德殿會百寮觀新樂

仲春藹芳景內廷宴羣臣森森列千戚濟濟趨鈞陳大
樂本天地中和序人倫正聲邁咸濩易象含義文玉俎

映朝服金鈿明舞茵韶光雪初霽聖藻風自薰時泰恩
澤溥功成行綴新賡歌仰昭回竊比華封人

奉和聖製中和節百官宴集因示所懷

萬方慶嘉節燕喜皇澤均曉間冀葉初景麗星鳥春藻
思貞百度著明並三辰物情舒在陽時令弘至仁衢酒
和樂被薰絃聲曲新賡歌武弁側永荷玄化醇

奉和聖製重陽日即事六韻

嘉節在陽數至歡朝野同恩隨千鍾洽慶屬五稼豐時

菊洗露華秋池涵霽空金絲響仙樂劒烏羅宗公天道
光下濟睿詞敷大中多慙擊壤曲何以荅堯聰

奉和聖製豐年多慶九日示懷

寒露應秋杪清光澄曙空澤均行葦厚年慶華黍豐聲
明暢八表燕喜陶九功文麗日月合樂和天地同聖言
在推誠臣職惟匪躬瑣細何以報飄飛淳化中

贈文敬太子廟時享退文舞迎武舞樂章

干旄羽籥相虧蔽一進一退殊行綴昔獻三雍盛禮容

今陳六佾崇儀制

讀穀梁傳二首

荀寅士吉射誠乃蔽聰明奈何趙志父專舉晉陽兵下
令漢七國借此以為名吾嘉徙薪智禍亂何由生

憶昔梁會豈伊無諸侯羣臣自盟歆君政如贅旒有
力則宗楚何人復尊周空文徒爾貶命去更誰尤

劉紹相訪夜話因書即事

故人愴久別茲夕款郊扉山僮漉野醞穉子褰書帷清

露泣珠瑩金波流玉微忘言我造適瞪視君無違但令
靜勝躁自使癯者肥不待遽生年從此知昔非

卧病喜惠上人李鍊師茅處士見訪因以贈

沉痾結繁慮卧見書窓曙方外三賢人惠然來相親整
巾起曳策喜非車馬客支郎有佳文新句凌碧雲霓裳
何飄飄浩志凌紫氛復有沉冥士遠係三茅君各言麋
鹿性不與簪組羣清言出象罔曠跡逃玄纁心源暫澄
寂世故方糾紛終當逐師輩巖桂香氤芬

多病戲書因示長孺

行年未四十已覺百病生
眼眩飛蠅影耳厭遠蟬聲
甘辛敗六藏冰炭交七情
唯思曲肱枕搔首擲華纓

古興

月中有桂樹無翼難上天
海底有龍珠下隔萬丈淵
人生大限雖百歲就中三十稱
一世晦明烏兔相推遷
雪霜漸到雙鬢邊
沉憂戚戚多浩歎
不得如意居大半
一氣暫聚常恐散
黃河清兮白石爛

感寓

殘雨倦敲枕病中時序分秋蟲與秋葉一夜隔窓聞虛
室對搖落晤言無與羣冥心試觀化世故如絲棼但看
鳶戾天豈見山出雲下里徒擊節朱絃秘南薰梧桐秀
朝陽上有威鳳文終待九成奏來儀瑞吾君

跌傷伏枕有勸釀酒者暫忘所苦因有一絕
一杯宜病士四體委胡牀暫得遺行處陶然在醉鄉
病中苦熱

三伏鼓洪爐支離一病夫倦眠身似火渴歎汗如珠悵
之心難定沉煩氣欲無何時洒微雨因與好風俱

覽鏡見白鬚數莖光鮮特異

秋來皎潔白鬚光試脫朝簪學酒狂一曲酣歌還自樂
兒孫嬉笑挽衣裳

南亭曉坐因以示璩

隱几日無事風交松桂枝園廬含曉霽草木發華姿跡
似南山隱官從小宰移萬殊同野馬方寸即靈龜弱質

常多病流年近始衰圖書傳授處家有一男兒

竹徑偶然作

退朝此休沐閉戶無塵氛杖策入幽徑清風隨此君琴
觴恣偃傲蘭蕙相氛氲幽賞方自適林西烟景曛

拜昭陵過咸陽墅

李子乏二項揚雄才一廛伊予此南畝數已踰前賢頃
歲辱明命銘勲鏤貞堅遂茲操書致內顧增缺然乃葺
場園事迄今三四年適因昭陵拜得抵咸陽田田夫競

致辭鄉耄爭來前杯盤既羅列雞黍皆珍鮮古稱祿代
耕人以食為天自慙廩給厚諒使井稅先塗塗溝塍霧
漠漠桑柘烟荒蹊沒古木精舍臨秋泉池籠豈所安樵
牧乃所便終當解纓絡田里諧因緣

早春南亭即事

虛齋坐清晝梅圻柳條鮮節候開新歷筋骸減故年振
衣慙艾綬闕鏡嘆華顛獨有開懷處孫孩戲目前

璩授京兆府參軍戲書以示兼呈獨孤郎

見爾府中趨初官足慰吾老牛還舐犢凡鳥亦將雛喜
至翻成感癡來或欲殊因慙玉潤客應笑此非夫

書紳詩

和靜有真質斯人稱最靈感物惑天性觸里紛多名禍
機生隱微智者鑒未形敗禮因近習詰人自居貞當令
念慮端鄙嫚不能萌苟非不踰矩焉得遂性情謹之在
事初動用各有程千里起步武白雲自織莖心源一流
放駭浪奔長鯨淵木苟端深枝沅則貞清和理通性術

悠久方昭明先師留中庸可以導此生

侍從遊後湖讌望

絕境殊不遠湖塘直吾廬煙霞旦夕生泛覽誠可娛
慈顏俯見喻輟爾詩與書清旭理輕舟嬉遊散煩劬宿雨
蕩殘燠惠風與之俱心靈一開曠機巧眇已踈中流有
荷花花實相芬敷田田綠葉映艷艷紅姿舒繁香好風
結淨質清露濡丹霞無容輝嫋色亦踟躕穠芳射水木
敲葉遊龜魚化工若有情生植皆不如輕舟任汭沂畢

景乃躊躇家人亦恬曠稚齒皆忻愉素絃激淒清旨酒
盈鐏壺壽觴既頻獻樂極隨歌呼圓月初出海澄輝來
滿湖清光照酒酣頻傾百慮無以茲心目暢敵彼名利
途輕肥何為者漿藿自有餘願銷區中累保此湖上居
無用誠自適年年翫芙蓉

晨坐寓興

清晨坐虛齋羣動寂未喧泊然一室內因見萬化源得
喪心既齊清淨教益敦境來每自愜理勝或不言亭柯

見榮枯止水知清渾悠悠世上人此理法難論

郊居歲暮因書所懷

養拙方去喧深居絕人事返耕忘帝力樂道踈世累脩
然衡茅下便有江海意寧知肉食尊自覺儒衣貴煙霜
當暮節水石多幽致三徑日閒安千峯對深邃策藜出
村渡岸幘尋古寺月魄清夜琴猿聲警朝寐地偏芝桂
長境勝烟霞異獨馬帶晴光踈篁淨寒翠窓前風葉下
枕上溪雲至散髮對農書齋心看道記清言覈名理閒

卷窮精義求譽觀朶頤危身臨芳餌紛吾守孤直世業
常恐墜就學緝韋編銘心對敬器元和暢萬物動植咸
使遂素履期不渝永懷丘中志

暮春閒居示同志

避諠非傲世幽興樂郊園好古每開卷居貧常閉門曙
鐘來古寺旭日上西軒稍與清境會暫無塵事煩靜看
雲起滅閒望鳥飛翻乍問山僧偈時聽漁父言體羸諳
藥性事簡見心源冠帶驚年長詩書喜道存小池泉脉

淒危棟燕雖喧風入松陰靜花添竹影繁灌園輸井稅
學稼奉晨昏此外知何有怡然向一罇

秋病初愈月夜詠左思招隱詩因而成詠

閒吟理輕步不厭涼風永斷續風際聲清羸月中影螢
光拂花露泉脉連桐井心暢百慮銷境閒萬籟靜前賢
有遺韻顧我三日省朗懷方自怡星河漸耿耿

卧病初愈崔侍御相訪

移疾門常掩今朝枉繡衣笑言心乍愜拜伏力猶微晚

歲貞筠少貧家上客稀如何忽相訪里巷有清輝

夏雨率成呈邑中諸公

片雲飛暮雨瀟灑小亭前細響疎無裏微涼坐卧間已
深池際水更綠枕前山未敢勞車馬柴扉且閉關

與故人夜坐道舊

笑語歡今夕煙霞愴昔遊清羸還對月遲暮更逢秋勝
理方自得浮名不在求終當製初服相與卧林丘

自咎

自咎咎何窮飄然華戶中清時名未立稔歲室猶空幽
獨慙芳桂飛鳴羨早鴻吟餘何所見歎息向秋風

田家即事

閒卧藜牀對落暉脩然便覺世情非漠漠稻花資旅食
青青荷葉製儒衣山僧相訪期中飮漁父同遊或夜歸
待學尚平婚嫁畢渚煙溪月共忘機

寓興

弱冠無所就百憂鍾一身世德既顛墜素懷亦堙淪風

煙隔嵩丘羸疾滯漳濱昭代未通籍豐年猶食貧敢求
庖有魚但慮甑生塵俯首愧僮僕蹇步羞親賓豈伊當
途者一一由中人已矣勿復言吾將問秋旻

浩歌

杖策出蓬華浩歌秋興長北風吹荷衣蕭颯景氣涼通
達抵山郭里巷連湖光孤雲淨遠峯綠水溢方塘魚鳥
樂天性雜英互芬芳我心獨何為萬慮縈中腸履道身
未泰主家謀不減心為世教牽跡寄翰墨場出處兩未

定羈羸空自傷沉憂不可裁佇立河之梁晚歸茅簷下
左右陳壺觴獨酌復長謠放心遊八荒得喪同一域是
非亦何常胡為苦此生矻矻徒自強乃知杯中物可使
憂患忘因茲謝時輩栖息無何鄉

與道者同守庚申

洞真善救世守夜看仙經俾我外持內當茲申配庚齋
心已恬愉澡身自激明沉沉簾幃下靄靄燈燭清四支
動用息一室虛白生收視忘超捨叩齒集神靈伊予嗜

金匱要略卷之二十一
欲寡居常病恙輕三尸既伏竄九藏乃和平無令耳目
勝則使性命傾竄然深夜中若與元氣并釋宗稱定慧
儒師著誠明派分示三教理詣無二名吉祥能止止委
順則生生視履苟無咎天祐期永貞應物智不勞虛中
理自冥豈資金丹術即此駐顏齡

丙寅歲苦貧戲題

清朝起藜牀雪霜對枯籬家人來告予今日無晨炊
醯一已罄薪炭固難期厚生彼何人工拙各異宜間歲

從使檄親賓苦川馳雖非悖而入與出常相隨吳門與
南畝頗亦持鉉基有時遇豐年歲計猶不支顏淵諒賢
人陋巷能自怡中憶裴子野泰然傾薄糜愧非古人心
戚戚愁朝饑近古猶不及太上那可希奈何時風扇使
我正性衰巧智競憂勞展轉生澆漓吾觀黃金印未勝
青松枝粗令有魚菽豈復求輕肥顧慙主家拙甘使羣
下嗤如何致一杯醉後無所知

獨酌

獨酌復獨酌滿盞流霞色身外皆虛名酒中有全德風
清與月朗對此情何極

知非

名教自可樂搢紳貴行道何必學狂歌深山對豐草

誠言

言之或未行前哲所不取方寸雖浩然因之三緘口

醉後

美祿與賢人相逢自可親願將花柳月盡賞醉鄉春

[illegible]

權文公集卷一

欽定四庫全書

權文公集卷二

唐 權德輿 撰

雜詩

奉和李相公早朝於中書候傳點偶書所懷奉
呈門下相公中書相公

五更鐘漏歇千門扃鑰開紫微殘月下黃道曉光來
色趁中禁分班列上台祥烟初繚繞威鳳正徘徊
斧藻

歸全德輪轅適衆材化成風偃草道合鼎調梅渥命隨
三接皇恩暢九垓嘉言造膝去喜氣沃心迴東閣延多
士南山賦有臺陽春那敢和空此詠康哉

奉和于司空二十五丈新卜城南郊居接司徒
公別墅即事書情奉獻兼呈李裴相公

一德承昌運三公翊至尊雲龍諧理代魚水見深恩別
墅池塘曉晴郊草木蕃溝塍連杜曲茅土盛于門卜築
因登覽經邦每討論退朝鳴玉會入室斷金言材俊依

東閣壺觴接後園
逕深雲自起風靜
葉初翻宰物歸心
匠虛中即化源
巴人寧敢和空此
媿遊藩

奉和新卜城南郊居得與衛右丞鄰舍因賦詩
寄贈

上宰坐論道郊居仍里仁
六符既昭晰萬象隨陶鈞
旭旦下玉墀鳴騶拂車茵
軒窓退殘暑風物迎蕭辰
山澤蜃雨出林塘魚鳥馴
豈同求羊逕共是義皇人
石君五曹重左戶三壤均
居止烟火接逢迎鷄黍頻
大方本無

隅盛德必有鄰千年郢曲後復此聞陽春

奉和韋曲壯言懷貽東曲外族諸弟

韋曲冠蓋里鮮原鬱青葱公台睦中外墅舍鄰西東
駟出國門晨曦正瞳矓燕居平外土野服參華蟲疆畝
分古渠烟霞連灌漑長幼序以齒歡言無不同憶昔全
盛時郎郇播休功代業擴宇內光塵藹墟中慨息多永
歎歌詩厚時風小生忝瓜葛慕義斯無窮

和王侍郎病中領度支煩迫之餘過西園書堂

閒望

憑檻輟繁務
晴光烟樹分
中邦均禹貢
上藥驗桐君
滿
逕風轉蕙
卷簾山出雲
鏘然玉音發
餘興在新文

奉和度支李侍郎早朝

夙駕趨北闕
曉星啓東方
鳴騶分騎吏
列燭散康莊
照
灼華簪並逶迤
綺陌長腰金
初辯色噴玉
自生光獻替
均三壤貞明
集百祥下才
叨接武空此
媿文昌

奉和劉侍郎司徒奉詔伐叛書情呈宰相

玉帳元侯重黃樞上宰雄緣情詞律外宣力廟謀中震
耀恭天討嚴凝助歲功行看畫麟閣凜凜有英風

奉和鄜州劉大夫麥秋出師遮虜有懷中朝親
故

天子愛全才故人雄外臺綠油登上將青綬亞中台亭
障鳴笳入風雲轉旆來蘭防分杳杳麥壠望萋萋月向
琯弓滿蓮依寶劒開行師齊鸛列錫馬盡龍媒壯志徵
梁甫嘉招萃楚材千尋推直幹百鍊去纖埃間閭勞相

望歡言幸早陪每聯花下騎幾泛竹間杯芳訊雙魚遠
流年兩鬢催何時介圭覲攜手詠康哉

太原鄭尚書遠寄新詩走筆酬贈因代書賀

曉開閭闔出絲言共喜全才鎮北門職重油幢推上畧
榮兼革履見深恩昔歲經過同二仲登朝並命慙無用
曲臺分季奉齋祠直筆繫年陪侍從芬芳鷄舌向南宮
伏奏丹墀跡又同公望數承黃紙詔虛懷自號白雲翁
戎裝蹀躞紛出祖金印煌煌寵司武時看介士閱犀渠

每狎儒生冠章甫晉祠汾水古并州千騎雙旌居上頭
新握兵符應感激遠緘詩句更風流緇衣諸侯諒稱美
白衣尚書何可比只今鄰閣待丹青努力加餐報天子

奉和許閣老酬淮南崔十七端公見寄

文行蘊良圖聲華挹大巫掄才超粉署駁議在黃樞自
得環中辨偏推席上儒八音諧雅樂六轡騁康衢密侍
金鉶珮雄才本棄繻鑪烟霏瑣闥宮漏滴銅壺舊友雙
魚至新文六義數斷金揮麗藻比玉詠生芻交辟嘗推

重單辭忽受誣風波疲賈誼岐路泣楊朱
溟漲前程險炎荒旅夢孤
空悲鷺跼水飜羨鴈銜蘆
故國方迢遞羈愁自鬱紆
遠猷來象魏霈澤過番禺
盡室扁舟客還家萬里途
索居因仕宦著論擬潛夫
帆席來應駛郊園半已蕪
夕陽尋井逕涼吹動纖枯
憶昔同駟傳忘懷或據梧
幕庭依古剎緡稅給中都
瓜步經過慣龍沙眺聽殊
春山嵐漠漠秋渚露塗塗
德興建中興元之間與崔同為鹽鐵邑大夫從事楊子既
濟寺貞元初德興受辟於江
西廡推崔又知度支院在焉
孰謂原思病非關甯武愚

方看簪獬豸俄歎繫駒駟芳訊風情在佳期歲序徂二
賢歡最久三益義非無柏悅心應爾松寒志不渝子將
陪禁掖亭伯限江湖交分終推轂離憂莫向隅分曹日
相見延首憶田蘓

奉和李給事省中書情寄劉苗崔三曹長因呈
許陳二閣老

常寮幾處伏明光新詔聯翩夕拜郎
五夜漏清天欲曙
萬年枝暖日初長
分曹列侍登文石
促膝閒謠接羽觴

共說漢朝榮上賞
豈令三友滯馮唐

過張監閣老宅對酒奉酬

見贈其年停貢舉

里仁無外事徐步
一開顏荆玉收難盡
齊竿喜暫聞秋風
傾菊酒霽景下蓬山
不用投車轄甘從倒載還

奉和張舍人閣老閣中直夜思聞雅琴因以書事通簡僚友

紫垣宿清夜
藹藹復沉沉
圓月衡漢淨
好風松滌深
軒窓韻虛籟
蘭雪懷幽音
珠露銷暑氣
玉微結遐心
盛才

本殊倫雅誥方在今佇見舒彩翮
翬飛鳳歸林

和兵部李尚書東亭詩

三接履聲退東亭斯曠然風流披
鶴氅操割佩龍泉雲
卷巖獻疊雨餘松桂鮮豈煩禽尚
遊所貴天理全

和司門殷員外早秋省中書直夜寄荆南衛象

端公

共嗟王粲滯荊州才子為郎憶舊
遊涼夜偏宜粉署直
清言遠待玉人酌風生北渚烟波
闊露下南宮星漢秋

早晚得為同舍侶知君兩地結離憂

酬陸三十二叅浙東見寄

驄馬別已久鯉魚來自烹慙慙故人意怊悵中林情茫茫重江外杳杳一枝瓊搔首望良覲為君華髮生

奉酬張監閣老雪後過中書見贈加兩韻簡南

省僚舊

寓直久叨榮新恩倍若驚風清五夜永節換一陽生潘鬢年空長齊芋藝本輕常時望連茹今日劇懸旌枉步

歡方接含毫思又縈煩君白雪句歲晏若為情

酬主客仲員外見賀正除

五年承乏奉如綸才薄那堪侍從臣
禁署獨聞清漏曉命書慙對紫泥新
周班每喜簪裾接郢曲偏宜諷詠頻
憶昔曲臺嘗議禮見君論著最相親

奉和太府韋卿閣老左藏庫中假山之作

春山仙掌百花開九棘腰金有上才
忽向庭中摹峻極如從洞裏見昭回
小松已負干霄狀片石皆疑縮地來

都內今朝似方外仍傳麗曲寄雲臺

奉和崔評事寄外甥劉同州并呈杜賓客許給

事王侍郎昆弟楊少尹李侍御并見寄之作

芳訊來江湖開緘粲瑤碧詩因乘黃贈才擅雕龍格深

陳名教本諒以仁義積藻思成采章雅音聞皦繹清時

左馮翊貴士二千石前日應星文今茲啟華戟謝公嘗

乞墅乞音氣甯氏終相宅往歲疲草玄忘年齊舉白酒酣

吟更苦夜艾談方劇棗巷風雨秋石頭烟水夕多逢長

金匱要略卷二
者轍不屑諸公辟酷似仰牢之雄詞挹亭伯老驥念千
里飢鷹舒六翮巨能捨郊扉來偶朝中客

和職方殷郎中留滯江漢初至南宮呈諸公并

見寄

十歲別文昌藩符寄武當師貞上介辟恩擢正員郎藻

思烟霞麗歸軒印綬光

項佐山南
榮加章服

還希駐輦問莫自嘆

馮唐

奉酬從兄南仲見示十九韻

晉季天下亂安丘佐關中德輝霽家牒侯籍推時功簪
纓盛西州清白傳素風逢時有舒卷繕性無窮通吾兄
挺奇資向晦道自充耕鑿汝山下退然安困蒙詩成三
百篇儒有一畝宮琴書滿座右芝术生墻東麗藻繁相
鮮晨輝艷芳藁清光杳無際皓魄流霜空邦有賢諸侯
主盟詞律雄薦賢比文舉理郡邁文翁樓中賞不獨池
畔醉每同聖朝闢四門發跡貴名公小生何為者往歲
學雕蟲華簪映武弁一年被微躬開緘捧新詩瓊玉寒

青葱謬進空內訟結懷遠忡忡時來無自疑刷翮摩蒼
穹

酬崔千牛四郎早秋見寄

浩歌坐虛室庭樹生涼風碧雲滅奇彩白露萎芳叢感
此時物變悠然遐想通偶來被簪組自覺如池龍少年
才藻新金鼎世業崇鳳文已彪炳瓊樹何青葱
安道接武承明宮君登玉墀上我侍彤庭中疲病多內
愧切磋常見同起予覽新詩逸韵凌秋空相愛每不足

因茲寓深衷

酬靈徹上人以詩代書見寄

時在薦福寺坐夏

蓮花出水地無塵中有南宗了義人已取貝多翻半字
還將陽燄論三身碧雲飛處詩偏麗白月圓時信本真
更喜開緘銷熱惱西方社裏舊相親

酬蔡十二博士見寄四韻

蕪城十年別蓬轉居不定終歲白屋貧獨誚清酒聖風
塵韋帶減霜雪松心勁何以浣相思啟元能盡性

君著周易

啟元
十卷

戲和三韻

墨翟突不黔范丹甌生塵君今復勞歌鶴髮吹濕薪前

詔許真秩何如巾軟輪

君貞元十一年以隱君拜命詔書令州府給傳乘詣闕到日授

正官

李十韶州寄途中絕句使者取報脩書之際口

號酬贈

詔下忽臨山水郡不妨從事恣攀登莫言向北千行鴈

別有圖南六月鵬

崔四郎協律以詩見寄兼惠蜀琴因以酬贈

臨風結煩想客至傳好音白雪絨郢曲朱絃亘蜀琴
泠泠響幽韻款款寄遐心晚歲何以報與君期斷金

酬馮絳州早秋絳臺感懷見寄

良牧閒無事層臺思渺然六條榮印綬三晉辯山川
洗
憤謳謠合開襟眺聽偏秋光連大鹵霽景下新田
葉落
徑庭樹人歸曲沃烟武符頒美化亥字訪疑年
經術推

多識卿曹亦累遷
齋祠常並冕
官品每差肩
按部青絲騎
裁詩白露天
知音愧相訪
商洛正閒眠

酬趙尚書杏園花下醉後見寄

時為太常卿

春光深處曲江西
八座風流信馬蹄
鶴髮杏花相映好
羨君終日醉如泥

酬趙尚書城南看花日晚先歸見寄

杜城常曲遍尋春
處處繁花滿目新
日暮歸鞍不相待
與君同是醉鄉人

權文公集卷二

欽定四庫全書

權文公集卷三

唐 權德輿 撰

雜詩

伏蒙十六叔寄示喜慶感懷三十韻因獻之

受氏自有殷樹功緬前秦主田接土宇侯籍相紛綸二十

代祖前秦射安丘敬公事具十六國春秋及晉書八代祖周宜昌公七代祖隋酈城公六代祖皇朝封平涼公皆以勲庸而道義集天爵菁華極人文握蘭中臺並折受爵土也

桂東堂春

五代伯祖屯田郎中府君叔祖水部員外郎府君同登省闈事具南宮故事曾祖父成都

府君曾祖叔梓州府君長安府君同以進士居甲科載在登科記之內也祖德蹈前哲家風

播清芬

王父古羽林錄事席君與席文公建侯友善文與蘇司業源明包著作融為文章之友唱酬佳

復各有文集

先公秉明義大節逢艱屯獨立挺忠孝至誠感

神人命書備追錫跡遠道不伸小生諒無似積慶遭昌

辰九年西掖忝五轉南宮頻司理因曠職曲臺仍禮神

愧非夔龍姿忽佐堯舜君內惟負且乘徒以弱似仁豈

足議大政所憂玷曩倫叔父貞素履含章窮典墳百氏

若珠貫九流皆翬分黃鍾蘊聲調白玉那縉磬清論坐
虛室長謠宜幅巾開關接人祠支榮無俗賓種杏當暑
熱烹茶含露新井徑交碧鮮軒牕棲白雲飛沉禽魚樂
芬馥蘭桂薰經術弘義訓息男茂嘉聞筮仕就色養晏
居忘食貧四方有起車上國有蒲輪行當反招隱豈得
常退身秦吳路杳杳朔海望沄沄侍坐馳夢寐結懷積
昏昕發函捧新詩慈誨情殷勤省躬日三復拜首書諸

紳

酬李二十二兄主簿馬跡山見寄

并序

族內兄暢純靜而深直方而文與予同偶居丹陽丹陽郭北四十里所有馬跡山山有奇峯怪石且多昔賢真仙之所游踐方外士殷渙然通易經老莊之旨居於山下從舅原均探異好古亦往來棲息其間貞元元年兄以典校秘書調補江陵松滋主簿以地遠不就職予以環衛兄秩罷漕輓從事且久家居食貧里巷相接其明年兄命駕遊此山予以疾故不克偕

往既而猥辱鍾陵檄召兄自山中以詩一首見貽理
精詞達清滌心府三復其文如至山下終篇則戲以
出處之跡見誚故予復之於此章仍如六十字以就

全數

杳杳塵外想悠悠區中緣如何戰未勝曾是教所牽遠
郊有靈峯夙昔棲真仙鸞聲去已久馬跡空依然丹崖
轉初旭碧落凝秋烟松風共蕭颯蘿月想嬋娟內兄蘊
遐心嘉遯性所便不能棲枳棘且復探雲泉中有冥寂

人間讀逍遙篇聯袂共交榮
握衣嘗絕編徐行石上苔
靜韻風中絃烟霞濕儒服
日月生寥天新詩來起子璫
璨六義全能盡含寓意轉令
山水鮮若聞笙鶴聲宛在
耳目前登攀阻心賞愁絕空
懷賢出處豈異途心冥即
真筌暫從西府檄終卧東菑
田不嫌予步蹇但恐君行
羶如能固曠懷谷口期窮年

酬陸四十楚源春夜宿虎丘山對月寄梁四敬

之兼見貽之作

東風變蘄薄時景日妍和更想千峯夜浩然幽意多蕙
香襲閒趾松露泣喬柯潭影漾霞月石牀封薜蘿夫君
非歲時已負青冥姿龍虎一門盛淵雲四海推駸駸步
騷裊婉婉翦長離玄圃盡瓊樹家林輕桂枝聲榮徒外
獎恬淡方自適逸氣凌顓清仁祠訪金碧芊眠瑤草秀
斷續雲竇滴芳訊發幽絨新詩比良覲故人石渠署美
價滿中朝落洛杉松直芬芬蘭杜飄雄詞鼓溟海曠度
豁烟霄營道幸同術論心皆後凋循環伐木詠緬邈招

隱情慙茲擁腫才愛彼潺湲清拘牽尚多故夢想何由
并終結方外期不待華髮生

酬穆七侍郎早登使院西樓感懷

耿耿宵欲半振衣庭戶前浩歌撫長劒臨風泛清絃晴
霜麗寒蕪微月露碧鮮杉梧韻幽籟河漢明秋天良夜
雖可翫沉憂邇浩然樓中遲啓明林際揮宿烟晨風響
鐘鼓曙色映山川滔滔天江駛杲杲朝日懸困窮西南
永得見天地全動直相糾紛車從競喧闐鱸鮓躍洪流

麝麝倚荒阡唼唼白雲鴈嘒嘒清露蟬一氣鼓萬殊晦
明相推遷義和無停鞅不得常少年當令志氣神及此
鬢鬚玄豈唯十六族今古稱其賢夫君才氣雄振藻何
翩翩詩輕沈隱侯賦擬王仲宣小鳥搶榆枋大鵬激三
千與君期晚歲方結林棲緣

奉和李大夫題鄭評事江樓

達士無外累隱几依南郭茅棟上江開布帆當砌落支
頤散華髮敲枕曝靈藥入鳥不亂行觀魚還自樂何時

金馬詔早歲建安作往事盡筌蹄虛懷寄杯杓邦君駐
千騎清論時間酌憑檻出烟埃振衣向寥廓心源齊彼
是人境勝巖壑何必棲冥冥始為避增繳

春遊茅山酬杜評事見寄

喜得賞心處春山豈計程連溪芳草合半嶺白雲晴絕
澗漱冰碧仙壇挹顥清懷君在人境不共此時情

和韓侍御白髮

白髮今朝見虛齋曉鏡清乍分霜簡色微映鐵冠生暮

下多能事周行挹令名流年未可歎正遇泰階平

和邵端公醉後寄于諫議之作

莫羨簷前柳春風獨早歸陽和次第發桃李更芳菲

和李大夫西山祈雨因感張曲江故事十韻

亞相冠貂蟬分憂統十聯火星當永日雲漢倬炎天齋
禱期靈貺精誠契昔賢中宵出騶馭清夜旅牲牷觸石
看初起隨車應物先雷音生絕巘雨足晦平阡瀟洒四
冥合空濛萬頃連歌謠喧澤國稼穡遍原田故事三台

盛新文六義全作霖應自此天下待豐年

同陸太祝鴻漸崔法曹載華見蕭侍御留後說
得衛撫州報推事使張侍御却迴前刺史戴
員外無事喜而有作三首

專城書素至留臺忽報張綱攬轡迴共看昨日蠅飛處
併是今朝鵲喜來

鶴髮州民擁使車人人自說受恩初如今天下無冤氣
乞為邦君雪謗書

衆人哺啜喜君醒渭水由來不雜涇遮莫雪霜撩亂下
松枝竹葉自青青

荅常秀才寄一首

中峯雲暗雨霏霏水漲花塘未得歸
心憶瓊枝望不見幾迴虛濕薜蘿衣

戶部王曹長楊考功崔刑部二院長並同鍾陵
使府之舊因以寄贈又陪郎署喜甚常僚因
書所懷且敘所知

忽驚西江侶共作南宮郎宿昔芝蘭室今茲駕驚行子
猷美風味左戶推公器含毫白雪飛出匣青萍利子雲
嘗燕居作賦似相如閒成考課奏別貢賢良書子玉諒
貞實持刑慎丹筆秋天鴻鵠姿晚歲松筠質伊子誠薄
才何幸復趨陪偶來塵右掖空此憶中臺時節東流駛
悲歡追往事待月登庾樓排雲上蕭寺盍簪蓮府讌落
帽龍沙醉極浦送風帆靈山眺烟翠解頤通善謔喻指
窮精義擗管或飛章分曹時案吏雨散與蓬飄秦吳兩

寂寥方期全擁腫豈望攝扶搖夜直分三署晨趨共九
霄外庭時接武廣陌更連鑣北極星辰拱南薰氣序調
欣隨衆君子並立聖明朝

貢院對雪以絕句代八行奉寄佳閣老

寓宿春闈歲欲除嚴風密雪絕雙魚思君獨步西垣裏
日日含香草詔書

初秋月夜中書宿直因呈楊閣老

敲枕直廬暇風蟬迎早秋沉沉玉堂夕皎皎金波流對

掌喜新命分曹諧舊遊相思翫華彩因感庾公樓

唐開州文編遠寄新賦累惠良藥咏嘆仰佩不
覺斐然走筆代書聊書還谷

風雨竦庭柯端憂坐空堂多病時節換所思道里長故
人朱兩轡出自尚書郎下車今幾時理行遠芬芳瓊瑤
覽良訊芣苢滿素囊結根在貴州蠲疾傳古方探擷當
五月慙懃逾八行深情婉如此善祝何可忘復有金玉
音煥如龍鳳章一聞靈洞說若覩羣仙翔三清飛慶霄

百汰成雄鉅體物信無對洒心願相將昔年同旅食終
日窺文房春風眺蕪城秋水渡柳楊君為太史氏弱質
羈楚鄉今來忝司諫千騎遙相望歸雲夕鱗鱗圓鬼夜
蒼蒼遠思結鈴閣何人交羽觴佇見徵潁川無為薄淮
陽政成看再入列侍爐烟傍

待漏假寐夢歸江東舊居

十年江浦卧郊園閒夜分明結夢魂舍下烟蘿通古寺
湖中雲雨到前軒南宗長老知心法東郭先生識化源

覺後忽聞清漏曉又隨簪佩入君門

祇命赴京途次淮口因書所懷

弱植素寡偶趨時非所任感恩再登龍求友皆斷金
彪炳覩奇采淒淒聞雅音適欣佳期接遽歎離思侵
靡靡遵遠道忉忉勞寸心難成獨酌謠空奏伐木吟
次寥清冬時蕭索白晝陰交歡諒如昨滯念紛在今
因風試矯翼倦飛會歸林向晚清淮駛回首楚雲深

省中春晚忽憶江南舊居戲書所懷因寄兩浙

親故雜言

前年冠獬豸戎府隨賓介去年簪進賢
贊導法宮前今茲戴武弁謬列金門彥
問我何所能頭冠忽三變野性慣踈閒
晨趨興暮還花時限清禁霽後愛南山
晚景支頤對樽酒舊遊憶在江湖久
庾樓柳寺共開襟楓岸烟塘幾攜手
結廬常占練湖春猶寄藜牀與幅巾
疲羸只欲思三徑慙直那堪備七人
更想東南多竹箭縣圃琅玕共葱蒨
裁書且附雙鯉魚偏恨相思未相見

寄李衡州

時所居即衡州宅

片石叢花盡不如底身三徑豈吾廬
主人千騎東方遠
唯望衡陽鴈足書

寄臨海郡崔穉璋

美酒步兵厨古人嘗宦遊
赤城臨海嶠君子今督郵
吏隱豐暇日琴壺共冥搜
新詩寒玉韻曠思孤雲秋
志士誠勇退鄙夫自包羞
終當就知己莫戀潺湲流

李韶州著書常論釋氏之理貴州有能公遺跡

詩以問之

常日區中暇時聞象外言曹溪有宗旨一為勘心源

馬上贈虛公

馬足旱塵深飄纓又滿襟吾師有甘露為洗此時心

郴州換印緘遣之際率成三韻因寄李二兄員

外使君

緘題桂陽印持寄朗陵兄刺舉官猶屈風謠政已成行
看換龜組奏最謁承明

早發杭州泛富春江寄陸三十一公佐

候曉起徒馭春江多好風
白波連青雲蕩漾晨光中
四望浩無際沉憂將此同
未離奔走途但恐成悲翁
俯見觸餌鱗仰目凌霄鴻
纓塵日已厚心累何時空
區區此人世所向皆樊籠
唯應杯中物醒醉為窮通
故人縣圃姿瓊樹紛青葱
終當此山去共結蘭桂叢

寄侍御從舅

初免職
歸山東

靡靡南軒蕙迎風轉芳滋
落落幽澗松百尺無附枝
世

物自多故達人心不羈偶陳幕中畫未負林間期感恩
從慙薦循性難繫維野鷗無俗質孤雲多異姿清冷松
霜泣照灼巖花遲終當稅塵駕來就東山嬉

湖上晚眺呈惠上人

湖上烟景好鳥飛雲自還幸因居止近日覺性情閒獨
酌乍臨水清機常見山此時何所憶淨侶話玄關

新秋月夜寄故人

客心宜靜夜月色澹新秋影落三湘水詩傳八詠樓何

窮對酒望幾處捲簾愁若問相思意隨君萬里遊

自楊子歸丹陽初遂閒居聊呈惠公

移疾喜無事卷簾松竹寒稍知名是累日與靜相歡蹇
淺逢機少迂踈應物難只思閒夜月共向沃州看

月夜過靈徹上人房因贈

此身會逐白雲去未洗塵纓還自傷今夜幸逢清淨境
滿庭秋月對支郎

戲贈張練師

月帔飄颻摘杏花相邀洞口勸流霞半酣乍奏雲和曲
疑是龜山阿母家

戲贈天竺靈隱二寺寺主

石路泉流兩寺分尋常鐘磬隔山聞山僧半在中峯住
共占青巒與白雲

贈廣通上人

身隨猿鳥在深山早有詩名到世間客至上方留盥漱
龍泓洞水晝潺潺

贈老將

白草黃雲塞上秋
曾隨驃騎出并州
轆轤劒折虬鬚白
轉戰功多獨不侯

權文公集卷三

欽定四庫全書

權文公集卷四

唐 權德輿 撰

雜詩

奉送常起居老舅百日假滿歸嵩陽舊居

威鳳翔紫氣孤雲出寥天
奇采與幽姿縹緲皆自然
嘗聞陶唐氏亦有巢由全
以茲聳風俗豈必效羈牽
大君遂羣方左史蹈前賢
振衣去朝市賜告歸林泉
滑和固

難久循性得所便有名皆畏途無事乃真筌舊壑窮杳
窅新潭漾淪漣崑花落又開山月缺復圓輕策透蘿徑
幅巾凌翠烟機閒魚鳥狎體和芝朮鮮四皓本違難二
疏猶待年況今寰海清復此鬢髮玄顧慙纓上塵未絕
區中緣齊竽終自退心寄嵩峯巔

奉送孔十兄賓客承恩致政歸東都舊居

達人曠迹通出處每憶安居舊山去乞身已見抗疏頻
優禮新聞詔書許家法遙傳闕里訓心源早遂嵩丘侶

南史編年著盛名東朝侍講常虛佇角巾華髮忽自遂
命服金龜君更與白雲出岫暫逶迤鴻鵠入冥無處所
歸路依依童稚樂都門藹藹壺觴舉能將此道助皇風
自可殊途並伊呂

送密秀才吏部駁放後歸蜀應崔大理序

蜀國本多士雄文似相如之子西南秀名在賢能書薄
祿且未及故山念歸與迢迢三千里返駕一羸車玉壘
長路盡錦江春物餘此行無慍色知爾戀林廬

送袁中丞持節冊南詔五韻

淨字

西南使星去遠徹通朝聘烟雨熨道深麾幢漢儀盛途
輕五尺險水愛雙流淨上國洽恩波外臣遵禮命離堂
駐騶馭且盡罇中聖

人日送房二十六侍御歸越

驛騎歸時馳馬蹄蓮花府映若耶溪帝城人日風光早
不惜離堂醉似泥

送張閣老中丞持節冊弔回鵲

旌旆翩翩擁漢官
君行常得遠人歡
分職南臺知禮重
輟書東觀見才難
金章玉節鳴騶遠
白草黃雲出塞寒
欲散別愁唯有醉
暫煩賓從駐征鞍

送二十叔赴任餘杭尉

得琴字

拜首直城陰
罇開意不任
梅仙歸劇縣
阮巷奏離琴
春草吳門綠
秋濤浙水深
十年曾旅寓
應愜宦遊心

奉送十四叔赴任渝州錄事絕句

得中字

隨牒忽離南北巷
解巾都吏有清風
巴城鎖印六聯靜

盡日間謠廊署中

送常十二丈赴襄城令三韻

得柳字

留連出關騎斟酌臨歧酒舊業傳一經新官裁五柳去
去望行塵青門重回首

送薛十九丈授將作主簿分司東都賦得春草

芊芊遠郊外杳杳春嵒曲愁處映微波望中連淨綠日
暮藉離觴折芳心斷續

送正字十九兄歸江東醉後絕句

命駕相思不為名春風歸騎出關程離堂莫起臨歧歎
文舉終當薦禰衡

送張詹事致政歸嵩山舊隱

得青字

解龜辭漢庭却憶少微星直指常持憲平反更恤刑閒
思紫芝侶歸卧白雲扃明詔優筋力安車適性靈羣公
來謁謁獨鶴去冥冥想到揮金處嵩吟枕上青

送許著作分司東都

月旦繼平輿風流仕石渠分曹向瀍洛守職正圖書棣

萼勞相映瓊枝色不如賓朋爭漉酒徒御待巾車異日
始離抱維思烹鯉魚

送少清赴潤州參軍因思練舊居

得朝字

二紀樂簞瓢烟霞暮與朝因君宦遊去記得春江潮遠
別更搔首初官方折腰青門望離袂魂為阿連銷

送濬上人歸揚州禪智寺

嘉露宗通法已傳麻衣筇杖去悠然揚州後學應相待
遙想旂花古寺前

獻歲送李十兄赴黔中酒後絕句

一罇歲酒且留歡
三峽黔江去路難
志士感恩無遠近
異時應戴惠文冠

送張僕射朝見畢歸鎮

青光照目青門曙
玉勒琤戈擁騶馭
東方連帥南陽公
文武吉甫如古風
獨奉新恩來謁帝
感深更見新詩麗
共看三接欲為霖
却念百城同望歲
雙旌去去戀儲胥
歸路鶯花伴隼旗
今日漢庭求上畧
留侯自有一編書

送常行軍員外赴河陽

五代武弁侍明光輟佐中權拜外郎記事還同楚倚相
傳經遠自漢扶陽離堂處處羅簪組東望河橋壯鞞鼓
三城曉角啓軒門一縣繁花照蓮府上畧儒風並者稀
翩翩騶騎有光輝只今右職多虛位應待他時伏奏歸

送常中丞奉使新羅

得往字

淳化洽聲名殊方均惠養計書重譯至錫命雙旌往星
辭北極遠水泛東溟廣斗柄辨霄程天琛宜畫賞孤光

洲島迴淨綠烟霞敞展禮盛賓徒交歡覲君長經途勞
視聽愴別紫夢想延頸旬歲期新恩在歸鞅

送從翁赴任長子縣令

家風本鉅儒吏職化雙鳧啓事才方愜臨人政自殊地
雄韓上黨秩比魯中都拜首春郊夕離盃莫向隅

送從弟廣東歸絕句

夏雲如火鏢晨輝款段羸車整素衣知爾業成還出谷
今朝莫愴斷雲飛

送王練師赴王屋洞

稔歲在芝田歸程入洞天白雲辭上國青鳥會羣仙自
以碁銷日寧資藥駐年相看話離合風馭忽泠然

送薛溫州

得驚字

昨日饋連營今來刺列城方期建禮直忽訪永嘉程郡
內裁詩暇樓中遲客情憑君減千騎莫遣海鷗驚

送黔中裴中丞閣老赴任

得迴字

五諫留中禁雙旌輟上才內臣持鳳詔天廡錫龍媒宴

語睽蘭室輝榮亞柏臺懷黃宜命服舉白歎離杯景霽山
川迴風清霧露開辰溪分浩淼楚道接縈迴勝理環中
得殊琛徼外來行看旬歲詔傳慶在公台

送崔諭德致政東歸

天子坐法宮詔書下江東懿此嘉遯士蒲車赴丘中褐
衣入承明樸畧多古風直道侍太子昌言沃宸聽品居
四十年心與鷗鳥同一朝受恩澤自說如池龍乞骸歸
故山累疏明深衷大君不奪志命錫忽以崇旭日出國

門輕裝若秋蓬家依白雲嶠手植丹桂叢竹齋引寒泉
霞月相玲瓏曠然解赤綬去逐冥冥鴻

送三十叔赴任晉陵

心字德興舊居在
丹陽去晉陵百里

春雲結暮陰侍坐捧離襟黃綬輕裝去青門芳草深十
年塵右職三徑寄遐心便道停橈處應過舊竹林

送安南裴都護

忽佩交州印初辭列宿文莫言方任遠且貴主憂分迥
轉朱鳶路連飛翠羽羣戈船航漲海旌旆卷炎雲絕徼

褰帷識名香夾轂焚懷徠通北戶長養洽南薰暫歎同心阻行看異績聞歸時無所欲薏苡或煩君

送別院汎

念爾強學殖非貫早從師溫溫稟義方慥慥習書詩計偕來上國宴喜方怡怡經術既脩明藝文亦歲蕤伊予諒無取瑣質荷洪慈偶來貳儀曹量力何可支廢業固相受避嫌誠自私徇吾刺促心婉爾康莊姿古人貴直道內訟乖坦夷用茲處大官無乃玷清時羸車出門去

悵望交涕洟琢磨貴分陰歲月若飈馳千里起足下豐
年繫鉉鉞苟令志氣堅佇見纓珮隨斑斕五綵服前路
春物熙舊遊憶江南環堵留蓬茨湖水白於練萼羹細
若絲別來十三年夢寐時見之寵榮忽踰量荏苒不自
知晨興愧華簪止足為靈龜遐路各自愛大來行可期
青冥在目前努力調羽儀

送工部張曹長大夫奉使西蕃

殊隣覆露同奉使小司空西候車徒出南臺節印雄弔

祠將渥命導驛暢皇風故地山河在新恩玉帛通塞雲
凝廢壘關月照驚蓬青史書歸日翻輕五利功

九華觀宴餞崔十七叔判官赴義武幕兼呈書

記蕭校書

炎光三伏晝洞府宜幽步宿雨潤芝田鮮風搖桂樹陰
陰臺殿敞靡靡軒車駐晚酌臨水情晨裝出關路偏榮
本郡辟倍感元臣遇記室有門人因君達書素

送文暢上人東遊

桑門許辯才外學接宗雷護法麻衣淨翻經貝葉開宗
通知不染妄想自堪哀或結西方社師遊早晚迴

送靈武范司空

上畧在安邊吳鉤結束鮮三公臨右地七萃擁中堅舊
壘銷烽火新營辯井泉伐謀師以律賈勇士爭先塞迴
晴看月沙平遠際天榮薰知屈指應在盛秋前

送商州杜中丞赴任

安康地里接商於帝命專城總賦輿夕拜忽辭青瑣闥

晨裝獨捧紫泥書
深山古驛分騶騎
芳草閒雲逐隼旟
綺皓清風千古在
因君一為謝巖居

送殷卿罷舉歸淮南舊居

計偕十上竟無成
忽憶崑居便獨行
志業嘗探絕編義
風塵虛作棄繻生
歲儲應歎山田薄
里社時逢野醞清
惆悵中年羣從少
相看欲別倍關情

權文公集卷四

欽定四庫全書

權文公集卷五

唐 權德輿 撰

雜詩

送杜尹赴東都

商於留異績河洛賀新遷
朝選吳公守時權杜尹賢
如綸披鳳詔出匣淬龍泉
風雨交中土簪裾敞別筵
清明人比玉照灼府如蓮
佇報司州政徵黃似潁川

送孔江州

九派潯陽郡分明似畫圖
秋光連瀑布晴翠辨香鑪
才子猷蘭省邦君榮竹符
江城多暇日能寄八行無

送渾鄧州

年少守南陽新恩印綬光
輕軒出繞雷利刃發干將
風勁初飛葉雲寒方護霜
想君行縣處露冕菊潭香

壩橋達奚四于十九陳大三
侍御夜宴叙各賦

二韻

滿樹鐵冠瓊樹枝
蹲前燭下心相知
明朝又與白雲遠
自古河梁多別離

酬別蔡十二見贈

伊人茂天爵恬澹卧郊園
傲世方隱几說經久
顓門浩歌曳柴車
詎羨丹轂尊嚴霜被鶉衣
不知狐白溫游心
義文際愛我相討論
潢汙忽朝宗傳騎令
載奔崢嶸歲陰晚
愀愴離念繁別館
絲桐清寒郊烟雨
昏中飲見逸氣縱
談窮化元佇見公
車起聖代待乞言

揚州與丁山人別

將軍易道令威仙華髮清談得此賢惆悵今朝廣陵別
遼東後會復何年

送台州崔錄事

不嫌臨海遠微祿代躬耕古郡紀綱職扁舟山水程詩
因琪樹麗心與瀑泉清盛府知音在何時薦政成

送信安劉少府

自常州泰
軍選授

相看結離念盡此林中淥夷代輕遠遊上才隨薄祿參

卿滯孫楚隱市同梅福吏散時泛絃賓來閒覆局襟情
無俗慮談笑成逸躅此路足灘聲羨君多水宿

送李城門罷官歸嵩陽

城門院在
遺補院東

與君相識處吏隱在牆東啓閉千門靜逢迎兩掖通罷
官多暇日肄業有儒風歸去塵寰外春山桂樹叢

送上虞丞

越郡佳山水菁江接上虞計程航一葦試吏佐雙鳬雲
壑窺仙籍風謠驗地圖因尋黃絹字為我弔曹盱

送盧評事婺州省觀

知向東陽去晨裝見綵衣客愁青眼別家喜玉人歸漢
漢水烟晚蕭蕭楓葉飛雙溪泊船處候吏拜胡威

送崔端公郎君入京觀省

已見風姿美仍聞藝業勤清秋上國路白晝少年人帶
月輕帆疾迎霜綵服新過庭若有問一為說漳濱

送張周二秀才謁宣州薛侍郎

儒衣兩少年春棹輟溪船湖月供詩興嵐風費酒錢上

帆涵浦岸敲枕傲青天不用愁羈旅宣城太守賢

送張將軍歸東都舊業

功名不復求舊業向東周白草辭邊騎青門別故侯
摧殘寶劍折羸病綠珠愁日暮寒風起猶疑大漢秋

送句容王少府簿領赴上都

上國路綿綿行人候曉天離亭綠綺奏鄉樹白雲連
江露濕征袂山鷺宜泊船春風若為別相顧起樽前

送從弟謁員外叔父迴歸義興

異鄉兄弟少見爾自依然來酌林中酒去耕湖上田何
朝逢暑雨幾夜泊漁烟餘力當勤學成名貴少年

送梁道士謁壽州崔大夫

年少一仙官清羸駕絲鸞洞宮雲渺渺花路水漫漫歲
計芝田熟晨裝月帔寒遥知小山桂五馬待邀歡

送鄭秀才貢舉

西笑意如何知隨貢舉科吟詩向月露驅馬出烟蘿晚
色平蕪遠秋聲候鴈多自憐歸未得相送一勞歌

送謝孝廉移家越州

家承晉太傅身慕魯諸生又見一帆去共愁
千里程沙平古樹迴潮滿曉江晴從此幽深
去無妨隱姓名

送韓孝廉侍從赴舉

貢士去翩翩如君最少年綵衣行不廢儒服
代相傳曉月經淮路繁陰過楚天清談遇知
已應訪孝廉船

送陸拾遺祇召赴行在

鵷鷺承新命鸞飛入漢庭歌詩能合雅獻納
每論經月

曉蜀江迴猿啼楚樹青幸因焚草暇書札訪沉冥

送暎師歸本寺

還歸柳寺去遠遠出人羣
苔甃桐華落山窓桂樹薰
引泉通絕澗放鶴入孤雲
幸許宗雷到清談不易聞

送宇文文府赴官

送君當歲暮斗酒破離顏
車騎擁寒水雪雲凝遠山
且安黃綬屈莫羨白鷗閒
從此圖南路青雲步武間

送岳州溫錄事赴任

解巾州主簿捧檄不辭遙獨鶴九霄翼寒松百尺條晨
裝沾雨雪旅宿候風潮為政閒無事清談肅郡僚

送山人歸舊隱

工為楚辭賦更著魯衣冠歲儉山田薄秋深晨服寒世
人榮燕頷志士戀漁竿會被公車薦知君久晦難

惠上人房宴別

方袍相引到龍花支榮開襟路不賒法味已同香積會
禮容疑在少施家逸民羽客期皆至踈竹青苔景半斜

究竟相依何處好匡山古社足烟霞

送裴秀才貢舉

儒衣風貌清去抵漢公卿賓貢年猶少篇章藝已成臨
流惜暮景話別起鄉情離酌不辭醉西江春草生

送袁太祝衡婺巡覆

同用山字

校緡稅畝不妨閒清興自隨魚鳥間知君此去足佳句
路出桐溪千萬山

送湖南李侍御赴本使賦採菱亭詩

舊俗採菱處津亭風景和沅江收暮靄楚女發清歌曲
岸紫絳葉荒堦上白波蘭橈向蓮府一為枉帆過

送穆侍御歸東都

知君儒服貴綵繡兩相輝婉婉成名後翩翩擁傳歸江
深煙霧沒山暗雨雲飛共待酬恩罷相將去息機

送崔端公赴度支江陵院三韻

照字

津亭風雪霽斗酒留征棹星傳指湘江瑤琴多楚調偏
愁欲別處黯黯頽陽照

送陸太祝赴湖南幕同用送字三韻

不憚征路遙定緣賓禮重新知折柳贈舊侶乘籃送此
去佳句多楓江接雲夢

送李處士歸弋陽山居

限姓名
中用韻

暫來城市意何如却憶葛陽溪上居不憚薄田輸井稅
自將嘉句著州閭波翻極浦檣竿出霜落秋郊樹影疎
想到家山無俗侶逢迎只是坐籃輿

送清洙上人謁信州陸員外

暫辭長老去隨緣
候曉輕裝寄客船
佳句已齊康寶月
清談遠指謝臨川
灘經水瀨逢新雪
路過漁潭宿暝烟
暇日若隨千騎出
南巖只在郡樓前

送別同用閻字

三韻

耿耿離念繁蕭蕭涼葉脫
緇塵素衣敝風露秋江闊
想得讀書窓巖花對巾褐

送人使之江陵

賞字

嘉招不辭遠捧檄
利攸徃行役念前程
讌游睽舊賞征

軺星乍動江信潮應上烟水飛一帆霜風搖五兩紛紛
別袂舉切切離鴻響後會杳何時悠悠勞夢想

餘干贈別張二十二侍御

蕪城陌上春風別於越亭邊歲暮逢驅車又愴南北路
返照寒江千萬峯

雜言賦得風送崔秀才歸白田限三五六七言

得暄字

響深澗思啼猿聞入蘋洲暖輕隨柳陌暄淡蕩乍飄雲

影芳菲遍發花源寂寞春江別君處和烟帶雨送征軒
雜言同用離騷體送張評事襄陽覲省

黯離堂兮日晚儼壺觴兮送遠遠水霽兮微明杜蘅秀
兮白芷生波泣泣兮烟冪冪凝暮色於空碧紛離念兮
隨君沂九江兮經七澤君之去兮不可留五采裳兮木
蘭舟

嶺上逢久別者又別

十年曾一別征路此相逢馬首向何處夕陽千萬峰

贈別表兄韋卿

新讀兵書事護羌腰間寶劍映金章少年百戰應輕別
莫笑儒生淚數行

古離別

人生天地間瞥若六轡馳天壽既常數奈何生別離跡
當中人域正性日已衰是非千萬境杳靄情塵滋出門
事何常暫別亦難期冉冉歎流景悠悠限山陂盡此一
夕歡華罇會前墀鷄鳴東方曙夙駕臨通達欲出強移

步欲留難致辭兩情不得已念此留何為天明去已遠
寂默居人歸入門復上堂怳怳生驚疑經履同遊處猶
言常相隨覽物或臨盤翻恠來何遲乃知前日歡本為
今日悲持此別後心寧及未見時則知交疎分久久翻
易時報君未別後別後當自知



權文公集卷五